



Christopherus apud Saxonès natus est anno circiter 1518. Hic cum felici ingenio esset præditus, operam literis dedit, & prima rudimenta facile percepit. postea sese ad doctorum uirorum gymnasia contulit, & in primis apud Saxones plurimum profecit. Cum is linguarũ usum optimè percepisset, etiam Philosophiæ incubuit, & in ea præclaram sibi eruditionem comparauit. postea quoq; Medicum studium, et sacrarum etiam literarum lectionẽ coniunxit, atq; in omni genere disciplinarum tanta dexteritate perrexit, ut uiris doctissimis meritò conferri queat. Accedebat & uitæ integritas, atq; naturalis quædam facundia. Id cum proceres in celebri Academiâ Franckofordensi ad Oderã cognouissent, hunc Christopherrum inter suæ scholæ professores receperunt, atq; bonos authores iuuentuti explicare iusserũt. id quod ipse magna solertia & auditorum maximo emolumentò egregiè præstitit. Quin etiam Ciceronis aliquot opuscula suis commentarijs illustrauit, & in gratiam studiosorum Basileæ edidit. Hoc modo is etiam num Franckoforti pergit, & omni genere literarum edoctus cunctis bonis, præsertim uerò Ioachimo Brandenburgensi electori, gratissimus existit. Nec etiam dubitandum, quin breui ille suis lucubrationibus doctissimis magnam gratiam apud optimos quosq; sit initurus. id quod uiri docti passim de ipsius ingenio prædicant. Ano-
nymos.